

**08 OCTOMBRIE**  
**RUGACIUNEA**  
**SF. CUVIOS**  
**TRIFON DE LA VIATSK**

**Молитва**

О священная главо, преподобне отче наш Трифоне! Земный ангеле и небесный человек, светильниче пресветлый, страну Вятскую озаряя чудесы, граду нашему стено и утверждение, бедствующим крепкий помощниче, обители твоя добрый хранителю, присный о нас к Богу молитвенниче и теплый о душах наших ходатаю! Тебе, угодниче Божий, неистощимое от Всеблагаго Владыки благодати и даров дадеся сокровище, еже целити недуги телесныя и отгоняти страсти душевныя и от всех зол избавляти с верою имя твое призывающих. К тебе убо прибегаем и тебе припадающе молимся: не презри нас, молящихся тебе и твоя просящих помощи, избави нас от враг видимых и невидимых, завистно на ны возстающих и яростию зверскою поглотити хотящих, изми нас невидимым предстательством твоим от смущения и бури и

тмочисленных скорбей наших, за грехи наша нам прибывающих. О предивный и богоносный отче наш Трифоне! Скоро потщися на помощь нашу. Вознеси благомогущую молитву твою ко Господу сил: страждущую страну Российскую от лютых безбожников и власти их Господь да свободит, и да возставит престол православных правителей; верных рабов Его, в скорби и печали день и ночь вопиющих к Нему, многоболезный вопль да услышит и да изведет от погибели живот наш, да потребит Господь от земли нашея вся неистовыя крामолы, и утвердит в ней безмятежие, мир и благочестие, да сохранит обитель твою святую, град наш и вся грады и веси страны нашея от глада и губительства, от мятежа и нестроения, от запаления и бури, от нападений вражиих и от тлетворных ветр и от всякаго зла. Умилостиви о нас благоприятными молитвами твоими Христа Бога нашего, еже избавитися нам от грех наших и наветов вражиих, яко да заступлением твоим и помощию в мире и тишине богоугодне зде на земли проживем, и в будущем веце да сподобимся части святых Господем нашим Иисусом Христом, Ему же подобает и честь и поклонение, ныне и во вся веки. Аминь.